



394310

Mag. St. Dr.

III

Biblioteka Jagiellońska



stdr0021977



# LAUDATIO THEOLOGICÆ

circa solennem ad Doctoratum in Sa-  
cra Facultate inaugurationem

*Perillustrium Clarissimorum & Admodum Reverendorum  
Dominorum,*

D. M. JOSEPHI ANTONII  
DE CLOS,

Sacrae Theologiae LICENTIATI, Cursus Moralís PROFESSORIS, COLLEGÆ  
MAJORIS, Siradiensis CANCELLARII, Ecclesiarum; Collegiatae S. FLORIANI Cle-  
pardiae ad Cracoviam CANONICI, ibidemq; Festorum SALVATORIS, ac B. V.  
MARIE CONCIONATORIS, Parochialis in Nasiechowice CURATI, Acade-  
miae Pinczovienlis, Contubernii Philosophorum, necnon Scholarum Novodvorscia-  
narum PROVISORIS.

D. M. JOANNIS JOSEPHI  
RYGALSKI,

Sacrae Theologiae LICENTIATI, Cursus Polemici PROFESSORIS, COLLEGÆ  
MAJORIS, Lancienfis CANCELLARII, Ecclesiarum; Collegiatae S. FLORIANI  
Clepardiae ad Cracoviam CANONICI, Parochialis Vetero-Corcinensis CURATI,  
Universitatis Cracoviensis GENERALIS PROCURATORIS, Contubernii Geloniani  
& Academiae Neo-Corcinensis PROVISORIS, Publici Sacrae Auctoritate Apo-  
stolica NOTARII.

Tertio semperque auspiciatissimo sub Regimine  
*Magnifici Perillustri & Reverendissimi Domini,*

D. M. JACOBI MICHAELIS  
MARCISZOWSKI,

Juris Utriusque DOCTORIS & PROFESSORIS, Ejusdemq; Facultatis PRO-CAN-  
CELLARII, Collegii Juridici SENIORIS PATRIS, Ecclesiarum, Cathedralis Cra-  
coviensis CANONICI, Collegiatae SS. OO. PRIMICERII, Parochialis in Koniufza  
CURATI, Librorum per Diocesim Crac. CENSORIS, Ordinandorum & Appro-  
bandorum EXAMINATORIS, JUDICIS SYNODALIS, Contuberniorum; Regio-  
Jagelloniani, Jurisperitorum, necnon Academiae Tarnoviensis PROVISORIS, Stu-  
dii Almae Universitatis Cracoviensis GENERALIS & AMPLISSIMI

RECTORIS.

*7. XXII. 27.*



Laureas Conferente Doctores  
*Perillustri Clarissimô & Admodum Reverendô Dominô,*  
**D. M. ANTONIO NICOLAO  
KRZANOWSKI,**

Sacrae Theologiae DOCTORE & PROFESSORE, Eiusdemq; Sacrae Facultatis DE-  
CANO, Almae Universitatis Crac: SENIORE PATRE, Ecclesiae S. FLORIANI  
Ciepardiae ad Cracoviam PRÆPOSITO, Canonizationis S. JOANNIS CANTII  
PROCURATORE, Contubernii Hierosolymitani PROVISORE.

**DISTINCTISSIMIS** coram **HOSPITIBUS**  
**SENATUQUE ACADEMICO**  
in **COLLEGIATA SANCTÆ ANNÆ** Cracoviensi **ECCLESIA**

à  
**M. ANDREA CANTIO  
SLECZKOWSKI,**

Philosophiae Doctore, ejusdemque Regio, & Tyliciano Eloquentiae Pro-  
fessore, Collega Majore, Ecclesiarum; Collegiatae Sanctae Annae Craco-  
viae Canonico, Archipresbyteralis Cracoviensis Pœnitentiario, S. R. Ma-  
jestatis Secretario, Publico Sacrae Authoritate Apostolica Notario

**DICTA,**

ac

**IISDEM**

**PERILLUSTRIBUS DOMINIS,**

*recenter DOCTORIBUS renuntiatis,*

**PATRIBUS SUIS & MECÆNATIBUS,**

in votivam supremi istius literarii Honoris aggratulationem  
perenneque reverentis animi testimonium

**NUNCUPATA.**

*Anno Domini 1768. Die 9. Mensis Februarii.*

---

Typis Collegii Majoris Universitatis Cracoviensis.



394340

III



PERILLUSTRES, CLARISSIMI,

& Admodum

REVERENDI DOMINI

NEODOCTORES, PATRES

&

MECÆNATES!



Um ego mecum cogitarem, quibus  
nam sub auspiciis præsens ista Theologia laudatio,  
quam Vestro suasu atque etiam hortatu suscepi,  
vulganda esset: intellexi rem perquam naviter  
hodierna diei celebritati accommodam, si Vestro Nomine in-  
signita lucem adspiciat. Equidem labor iste meus, qualis  
quantulusque est, profecto in gratiam Vestri susceptus: in  
Vestra igitur gratia & benevolentia patrocinium suum qua-  
rit, neque inventum iri diffidit. Id ipsum & argumentum  
rei jure postulare videtur. Theologia etenim illius Cæ-  
lestis atque supernæ Sapientiæ laudes continet, quæ dum



pulcherrima sua Doctorali laurea emeritas Vestras frontes  
hodie coronat, non modicam versa vice à virtute & eru-  
ditione Vestra dignitatis accessionem sibi lata gratulatur.  
Et quomodo non meritò gratuletur? dum Vos tales tantos-  
que Viros Doctorali in Sponsos sibi subarrhat annulò, qui  
& à natura ad quaque optima comparati, & longa exer-  
citatione diuturnoque usu ad difficilia quaque formati, in-  
geniò præcellentes, moribùs probi, meritis & annis graves,  
non exiguum Sacra Facultati decus splendoremque adfer-  
tis. Profectò quòd honorem nonnisi virtuosis & Sapienti-  
bus deberi atque etiam deferri oportere, communi omnium  
gentium populorumque voce consensuque accepimus: omni  
bono, & equo rerum ponderatori, cui indoles, labor & Sa-  
pientia Vestra perspecta fuerit, hac verò in luce atque ocu-  
lis nostrum omnium versantur, fatendum uliro est, exactum  
intercedere aequipondium inter dignitatis, quæ impræsentia-  
rum Vobis defertur excellentiam, atque meritorum, quibus  
ad illam eluctati estis, præstantiam. Nullus igitur facere  
potui, nisi & mea in Vos summa venerationi & iustitiæ  
etiam deesse vellem, quin Orationem istam, cuius Vos pars  
magna estis, amplissimis Vestris Nominibus dedicarem.  
Æviternum istud & devotionis & gratitudinis monumen-  
tum Vobis haberi percipio. Nihil verò aut ardentius opta-  
re, aut vehementius iterum iterumque precari possum, quàm  
ut D. O. M. vires Vestras laboribus Academicis fractas con-  
tinuò restauret, vitam vestram, omnium bonorum afflu-  
entiâ prosperam, nobis in solatium, atque rebus etiam Aca-  
demicis in columen & præsidium servet, cùmque humana  
conditio immortales Vos certè non sinat, diutissime vivatis.



# ORATIO.



Ovam & ante hanc diem inusitatam mihi dicendi provinciam, non aliqua mea ambitione attentatam (quæ procul abest à meæ naturæ modestia) sed officio meo ad id me permoven- te, libenter suscipienti optarem AA. quantum voluptatis in animo concipio, tantum in ora- tione nitoris atque elegantix, illâ, quæ in pecto- re meo altissimè creverat; expectatione concitari, meque parem quantacunque exultantium lætitiæ Oratorem, citra invidiam, eruditorumque censuram appellari. Nam cùm antea per ata- tem licuit Jurisprudentiæ contexuisse laudes, illamque coram supremis Senatoriæ auctoritatis culminibus, bonis rerum æstima- toribus, & incorruptis iudicibus, ad solemnem pariter Doctora- tûs actum, in illustri & præclara loci celebritate, ab honestate bonam, ab æquitate optimam deduxisse, tum quid desiderari po- tuit, præterquam Sacræ Theologiæ cunctarum artium Domine Reginæque observantia singularis, & tantus honos Principi scienti- arum & doctrinarû altissimarû summa semper demissione tributus ante omnium oculos, per me, quisquis ille sim? è vestigio statue- retur. Boni tandem Superi; Quorum arbitriô omnia reguntur; sextô abhinc annô vota coronant, tantô majore cordis exulta- tione, quantô virtutis uberior sit voluptas super labores inam- bulare. Quid superest? nisi orationis nitor & elegantia. Utrum- que horum quasi ex quodam largifluo fonte à sacra Doctrina satis superque proficiscitur. In utroque obgannientes scioli ti- mendos se objiciunt. Utrumque mihi alta mente tenendum, fa- tisfaciendum utrique. Primum eorum in Eo, Qui me confor- tat, non reformido, alterum nec leviter vereor. Hinc Sacra Fa- cultas dicendi ornatum, illinc resistendi subministrat acumen.



Ornatus ejusmodi magnitudo sine fūco, sine fumo, sine superbia, inter tot argumenta felicitatis nostræ, quasi inter pulcherrima florū agmina, ipsā venustatis copiā, ipsa dulcedinis satietate oppressos etiam & languentes, si languere dicantur? qui hac cælesti eruditione reviviscunt; erigit, consolidat, foveret. Quæ sanè in Theologiam ita proximè erumpit, ut infinitè à Deo delabatur. Primas ac secundum Deum partes jure sibi in hac causa potest vindicare Theologia. Quòd enim illa non solum Martyres imbuat constantiā ad contemnendos gladios, doctrinā Catholicos ad fraudem detegendam, puritate bonos ad evellenda vitia, sed etiam Divinæ providentiæ in perstringendis hostis animæ viribus certam rationem & sola aperiat, & perfectè complectatur, quantum nitor & apparatus! ut ipse tenebrarum incola, suis cum fraudibus compertus oculis habeatur. Sua est, non aliundè precariò quæsita Theologiæ gloria, sua elegantia, sua majestas. Cum utique illa inter alias scientias principem locum obtineat, & reliquas tanquam Domina regat suæ ditioni subjectas, illiusque in rebus fidei & animarum administranda salute, imperium sequantur, profectò amens sit & vecors, qui à tanta illius dignitate, ab utilibus ejusdem fructibus, tum denique ab ipsa supra reliquas omnes artes & disciplinas præstantia elegantiam in sua fore oratione desperet? Quametsi verò citius voluptate dissolvimur, quam illud, quod intra concepimus effundamus, ibunt tamen, ibunt Deo auspice Theologiæ laudes, & bile suffulos, omnia flava videntes ridebunt. Neque verò lapides, sentes, spinas inter Theologiæ suavitates in Momum effutiam, non cachinnos explodam, eum duntaxat, aut meliores epulas paraturum, & me convivā usurum, aut meas, quales quales sint, non reprehensurum voluerim. Sale hic aspergatur, nihil referat satyricum, deliniatur comitate oratio oportet. Hoc certè & confessus hic tam honorificus, & sapientia vestra singularis, & amor in literas nostras perpetuus, & loci sanctitas, & actus præsentis celebritas, & dicentis verecundia persuadere videtur. Dicam jam, ne vestros suspensos reddam animos, in eoque summam causæ totius statuam, quo nihil sapientium animos, aut majori admiratione defixos, aut voluptate suspensos tenet, quo natura humana perruptis justitiæ rationisque vinculis debilis & fracta magnopere ad recti honestique orbitam allecta incitataque pertrahitur, quo DEUS hujus tantæ molis & fingendæ prudentissimus Author, & moderandæ providissimus Pater, res nobis præstantes & excellentes proponit, ut ad illarum studium acuamur hebetes, excitemur oscitantes, & ad amorem illiciamur repugnantes. Et hæc quidem



dem quæ nam sint, & quomodò se habeant? tribus in punctis, brevissimè tamen expediam. Desiderium mihi his partibus flucturo & cogitatio mortalium tanquam quidam obex, aut quemadmodum ajunt; cerasse in via violentè opponitur? quid ineptum magis? aut ab ipsa animorum natura magis alienum videritis? Actum est de utroque, sublata desideria, ad incitas reducta vana cogitamina! THEOLOGIA DEUM CONTEMPLATUR, QUO NIHIL DIGNIUS; MORES HOMINUM FORMAT, QUO NIHIL HONESTIUS; INTEGRITATEM REIPUBLICARUM CONSERVAT, QUO NIHIL UTILIUS; NON TAM DESIDERARI, SED NEQUE COGITARI POSSE, pauculis clarè tamen deducetur. Animis vos adesse AA. mecumque hujus Divinæ Sapientiæ præstantiam & dignitatem amplissimam cognoscere vehementer oro, & obsecro, Audistis ordinem, videte rem.

Cùm altissimis mortalium animis insitus à natura ita veræ ac sinceræ dignitatis sit amor, ut ad eam possidendam & omnino consecrandam jure meritòque honestati & utilitati navent operam, tum satis demirari non possum turbulentos homines, & omnia pro libidine miscentes, linguâ tanquam flabellò sediti-onis concitados, quodammodò ab omni exturbatos ratione fragilibus caducisque rebus, velut solidis & nunquam perituris vota sua explere conari. Respiciant enim semetipsos, intelligant tandem aliquando conditionis suæ nobilitatem, & dignos naturæ excellentiâ sensus induant. Cogitent cælestis illius regionis, quæ nostris imminet capitibus, eximiam pulchritudinem, magnitudinem immensam, splendorem admirabilem, beatum pacis ac quietis domicilium, tantam bonorum omnium copiam ac suavitatem ad cumulandam illius patriæ magnificentiam à Deo liberaliter congestam. Reputent illi secum communem hanc nobis rerum abundantiam cum brutis etiam, copiam terrenorum atq; affluentiam ex æquo probis atque improbis ad arbitrium relictam, imò verò potentiorē sæpe, qui pejor; ditiorē, qui rapacior; feliciorem, qui detegitur sceleratior. Accedit ad hæc lacerari dissidiis regna & imperia, convelli populos & nationes, excindi urbes, depositas jacere provincias,, omnia ad interitum vergere, & rerum affluentiam tanto malo mederi non posse. Dicite! dicite, quibus voluptates corporis bonum sunt voluntatis, quantumcunque sibi solertis & in rebus amplectendis aut respuendis sagacis, quid sibi volunt ista? dicite! Potestate sibi permissa, vix dici potest, quàm sit debilis, & quàm facilè in omnem partem agitari, & in id, quod est deterius, flecti voluntatem vos subicetis! ego assentior: eamq; honestò & utili abuti, tempo-



canam dignitatem virtuosæ posthabere etiam atque etiam super-  
addo. Nam cum de honesto res agitur, illud in verbis, non  
in factis, in conversatione, at pudeat intentione rejecta! in gestu  
corporis, non in operis fructu, vos posuisse notum est, satisque  
perspectum. Quid quæso de utili referam? æquè illud tempora-  
neum est, si utile dicatur? quo vita adimitur. Cæci vos, in-  
consideratissimi & dementiores pecudibus cogitastisne in corde  
vestro abstrahere animam à carne vestra, & transferre ad sapi-  
entiae lucem, & videre, quid sit utile Filiis hominum? Et hæc  
media sunt dignitatem animo consentaneam perquirere! prohi-  
dolor! dominationem in caducis, cænum, atque fecem omni  
turpitudine longè deteriorem. Itaque fateamur necesse est, eli-  
cita è spiritu honestate atque utilitate, dignitatem virtuosam, ean-  
dem ipsam bonitatem, prudentiam, sanctitatem, capessendæ æter-  
næ in patria excellentiæ causâ directam, solam concupisci de-  
bere, ultra se non modò quidquam desiderari melius, sed neque  
cogitari posse. Hanc ultra nec quæsierunt, nec cogitarunt ali-  
quid, qui virtutum studio, qui Divinæ legi constanter adhæse-  
runt, qui labores innumeros, vigilias, solitudines, flagella, mille  
dolorum ac mortis species, illius causâ pertulerunt, qui Christi  
ipsius merita, cruciatus, supplicia, necem acerbissimam suis ipso-  
rum in meritis computarunt. Divinam secuti sunt dignitatem,  
tanquam sui procreatricem, vitiorum ac falsi expultricem, veri-  
tatis, utilis, ac honesti magistram, ut non jam opinionibus ho-  
minum ad varios errores abribi se paterentur, sed id, quod est  
rectum, & saluti consonum; sectarentur. Dilatarunt sui pectoris  
angustias, fræna cupiditati laxarunt, optarunt, appetiverunt, adspirâ-  
runt ad illa bona, quibus in possidendis animus sic acquiescit, ut  
neq; ea conservandi anxietate torqueatur, neque eadem amittendi  
metu crucietur. Fortunati jam mortales, quos tanta dignitatis  
æternæ magnitudo respexit. Nec miseros viatores fideles, qui  
divites facti sunt in Deo in omni scientia. Sed tempus est, in-  
stitutæ orationis expediamus seriem, iisdemque verbis, quibus  
initium dicendi accepimus, finem dicendi tentemus.

I.

Atque Theologiæ dignitatem invisere, quod contempletur  
Deum; primum est. Quid Deo dignius? quid Theologiâ præstane-  
tius dicendum vel cogitandum occurrit? Excelsa illa: præcellensq;  
Natura, magnitudine, immensitate, sapientiâ, omnique perfecti-  
one infinita, qua nihil beatius, nihil bonis omnibus affluentius  
concipi potest, de qua dicere etiam vera periculosum est. Prin-  
cipiò & sine carens cum semper fuerit, exploratum habet, tum  
in maximis,



in maximis, tum in æternis voluptatibus nunquam se non futuram. Potentiâ & virtute absoluta gaudet, neque hominum, neque Cælestium Spirituum comitatu ad suam felicitatem indiget explendam. Extra est, intra est, ubique est. Nihil sibi deficit, nihil accedit, nihil est varium, nihil à se diversum. Magnitudo sua sic illi redditur, ut mens hæc universi sola sit omnia. Natura isthæc DEUS est scientiarum Dominus, & non solum Author omnis sapientiæ, sed etiam idem ipse Instructor. Hic primordia Sacræ Theologiæ tradidit. Hic Princeps & Author est Cælestis istius disciplinæ, Quem sibi eadem scopum & finem præcipuæ maximæq; suæ dignitatis proponit. Namq; reliquæ scientiæ hominum industriâ sunt repertæ, & assiduo ac pertinaci labore propagatæ: hæc verò non aliquem mortaliū, sed ipsum Dei Filium, Patris æterni Sapientiam, in qua sunt omnes thesauri sapientiæ ac scientiæ reconditi, suum consummatorem agnoscit. Hæc alias quascunq; artes & scientias vetustate originis & generis nobilitate longè superat, de ore Altissimi producta, primogenita ante omnem creaturam, Sanctis Dei hominibus cælitus inspirata, & afflante Numine in amplissima dictata volumina. Huic uni facilè reliquæ omnes fasces submittunt scientiæ, primò illam ante se locò dignantur, nec unquam de aliqua injuria conquestæ sunt, aut de præstantia judiciò experiri voluerunt. Illæ in hujus mundi fabrica rerumq; in ea conditarum per investigatione versantur, aliæ rotant sceptræ, & secures, dirigunt consilia, flectunt populos, differunt bella, componunt tumultus, aliæ hominem libertate sua abutentem, qui prius ferebatur improvidus, & per præcipitia labebatur, frænò legis retinent, & compositis docent incedere pedibûs, aliæ grandi corporum plagæ alta & prolixa excogitant medicamina, aliæ res humanas Divinasq; cum studio bene vivendi cognoscere satagunt, hæc sola Authorem & Opificem universi Deum contemplatur. Quæ quidem in hoc genere officii eadem semper fuit, ante hujus mundi & hominis fabricam elegantissimam, tanti Numinis celsitatem infinitam expressit, cum Eo cuncta composuit, & ad genus humanum in pristinam dignitatem restituendum cum Duce Præceptoreque suo maximo Christo JESU in terras descendit. Atq; ego quidem cum Majestatem Filii Patris Æterni sacræ hujus salutarisq; disciplinæ Perfectoris, ipsius Divinæ humanæq; naturæ unionis eminentiam, nullâ Cælestis etiam cujuscunq; spiritûs eloquentiâ satis celebrari posse indubitanter fateor, tum mihi constare liquidò satisq; videtur, nihil jam majus ad dignitatem Theologiæ recensendam quæri debere. Hoc enim totum Divinitatem



tem spirat, hoc ab artibus & disciplinis, suisq; fabulosis & com-  
mentitiis inventoribus, longò Theologiam intervallò distinguit.  
Sanctitatem tamen ejus qua & ipsa perfungitur, & quam cumu-  
latè in genus mortalium diffundit, tacitus nullo modo præterire  
possum. Equidem quid tam est admirabile, quàm inter cæte-  
ras disciplinas, existere vim illam sapientiæ, quæ quod rerum  
omnium difficillimum, quod à sensibus remotum, quod ipsis su-  
pernis mentibus sit inaccessum; perscrutetur, & animis morta-  
lium instillet? absorbet Theologia, & audientibus insinuat. Quid  
est tam dignum aut futurorum, aut præsentium temporum præ-  
coniò, quàm in medio vitæ caducæ decursu, jam inter beatas il-  
las comprehensorum animas exspatiari, optata visione perfrui  
beneficiò Theologiæ datum id est atq; concessum. Divinæ na-  
turæ perfectionibus, emanationi Personarum, illiusq; proprietati-  
bus, quibus adinvicem secernuntur, quæ mentis aciem præter-  
labuntur, nec facile percipi possunt, Sacram Theologiam dedi-  
tam esse, quanta sanctitas, tanta dignitas. Adde verò ipsas per-  
fectiones, quæ multiplici ratione, in quovis Dei relucet opere  
& beneficio Theologiâ doceri, quàm manifesta asserendæ Divi-  
nitatis testimonia! Immensa Dei potentia nullis sub sole compa-  
randa viribus, quæ vi ac incredibili celeritate quidquid in crea-  
tis aut mentis, aut corporeò visitur oculò, unicò suæ virtutis  
produxerat verbò, hac se revelandam non subterfugit sapientia,  
ò robur! ò inauditam Theologiæ potestatem! Sapientia illa æter-  
na mirabili nexu & primarias mundi partes, & res universas il-  
larum ambitu contentas stabili ac perpetuo amicitiae consocians  
fædere huic se evolvendam commisit, quæ præstantia! quis ho-  
nor! quæ majestas! Misericordia Divina in collapsò hominis sta-  
tu restaurando copiosè effusa, celsitudo majestatis exinanita, &  
carnis nostræ mortalitate induta per hanc inducitur, quæ aucto-  
ritas? auctoritas! quam quoties cogito, extra me rapi videor.  
Eram enim debitor, æris inops, animam ipsam debui, Redem-  
ptor attulit sanguinem suum culpæ meæ pretium. Meum erat  
debitum, Illius pretium. Mea culpa, Illius pæna. Quid plura?  
rigor justitiæ insonat, Divina humanaq; jura temerantes impro-  
bos perditosq; homines æternis suppliciis mancipandos, arduos  
ignibus denuntiat? hac sacra doctrina promulgatrice denuntiat.  
Quin etiam Bonitas infinita exultantem in præmiis conferendis  
celeritatem, superabundam & inexhaustam beneficiorum copi-  
am, quibus præclaros conatus laboresq; susceptos, & in mon-  
stris flagitiorum profligandis, & in lege Divina adimplenda, &  
in cultu nominis ejus tuendo sit exornatura, certè per hanc sci-  
entiam



entiam pollicetur. Promissum ejusmodi, ut præ gaudio pauculis rem absolvam, cujus intimas ad voluptatem non excitet fibras, non enim ego de grege electorum censeo, sed reprobum alta voce judico. Nec utique ille illuminari ad bonum à malo discriminandum rationem, nec ad cognoscendum verum à falso, nec ad sciendum quid agi, quid credi, quid refutari oporteat? idoneus meâ sententiâ decernitur. Non intelligit claritate beatificæ se munerandum, facie ad faciem Deum visurum, adventitium quoddam, quod accidentale dicitur, insigne gaudium mentem beatæ gloriæ operum propter Deum susceptorum, atq; magnitudine difficultatum, & superatarum molestiarum exultaturam consecuturum nec credit, nec sperat, nec intelligit. O insipientiam singularem! amentiamne dicam? parum est, hæresis mihi in mentem arguenda occurrit. Nôstine in anima separata tanquam, in radice gaudium residere, & per quandam redundantiam explicandum in corpora, & signis quibûsdam manifestis & illustribus in agminibus Beatorum spectandum? Nôstine candoris nivei virginitati laureolam paratam, aut purpureo distinctam colore; Martyrio, aut instar vernantis palmæ viridem ex se fundentis splendorem Doctoratui in capitibus comprehensorum rutilaturum decus? Tu non nôsti, patitur Ecclesia. Vicit illa mansuetudine, vicit beneficiâ, vicit veritate. His præsidis Christus & post Ipsum Apostoli Judaicæ gentis expugnaverunt pervicaciam, Græciæ Philosophiâ tumentis vicerunt supercilium. His armis tot barbararum nationum invictam feritatem subegerunt. Hoc gladiô totius orbis Tyrannos ac satrapas fidei jugo subdiderunt. Quis autem non videat, quibus rebûs Christiana Religio nata, aucta ac constabilita sit, iisdem etiam prædicandam & annuntiandam Gentibus, ut fidei lumine collustratæ verum Deum agnoscant? hoc totum est Theologiæ, hoc illa gaudet gestitq; suam ad dignitatem perfungi ministeriô. Illi datum est scire mysterium Regni Dei & communicare. Per illam ingeri mentibus non debere gloriari sapientem in sapientia, nec fortem in fortitudine sua, nec divitem in divitiis suis, sed in hoc gloriari, quòd gloriatur nôsse Deum, quia ipse est Dominus; concessum est. Sibi deditos velut justos deducit Dominus per vias rectas, & ostendit illis Regnum Cælorum & dat illis scientiam Sanctorum. Per illam, quod mea opinione maximam dignitatem spectat, data est scientia salutis plebi. Ejus in remissionem peccatorum.



II. *De Theologia*  
Cogitemus ampliùs, quæ vis hujus salutis scientiæ innata esse videatur? Vim eam cogitemus, ut omnis vel pene omnis laude illius moveatur. Hac mores hominum interiores & externi componuntur, & sub regula disciplinæ omni rejecta turpitudine feruntur. Quidquid est in homine Christiano sive ad animum, sive ad corpus relatum, fulgidum hac fit & honestum. Omnia quæ aguntur cum corpore, vi hac excellenti mentaliter pervia sunt, luminosa sunt, quò ad intus & extra bona sunt, conversatione plena, & in omni sui parte splendida. Cogitatio & affectus, actus, gestus, habitus & affatus fulgent illius limpida claritate. Quametsi verò timeant nomen ejus, & in ipsa Theologiæ moralis memoria impallebant Athei, Epicurei, Machiavellopoliti & reliqui hujus fursuris Heterodoxi, nos tamen ad mentionem illius non contremiscimus, sed inflammamur, non quiescimus, sed quærimus, donec inveniamus, & amanter possideamus. Possidentes at verò cavillis velut fulminibus membrorum aridorum ferimur, & vincimus, arguimur & intelligimus, deferimur & augemur, per mortem filiorum vividi, per dispendia divites, per ruinas gloriosi efficimur, certè Magiltrum nostrum secuti, Qui vicit, cum judicatus est, cedendo superavit, & cadendo in mortem, resurrexit in gloriam. Sic semina messium gelu constricta & mortua germinant: sic ignis flatu premitur, ut crescat: sic unguenta commora redolent: sic aromata fragrantiam suam, cum incenduntur, latius expandunt: sic vinea putata uberior redditur & fecundior: sic Arca Noëmi ab undis sepelienda diluvii, ab iisdem altius ferebatur, ejusq; concussio, ipsius erat erectio: sic luna videtur deficere, & non deficit, & obumbrata non obscuratur, sic nos damnis & ruinis Hæreticorum impetimur, & in majorem nominis Catholici famam attollimur. Vivum est & efficax verbum Dei in nobis, quo metum & languorem pellimus, ad ardua & sublimia urgemur, rerumq; mundi vanitate ac fallaciâ cognitâ ad statum æternitatis immotum & perfectum invitamur. Abjicimus opera tenebrarum, & induimur arma lucis, & honestè ambulamus. Examine mentis interiore præmissio cogitamus, asperius macerando carnem vigilamus, bonis operibus ad fidem adjunctis laboramus, sincerius moribus innixi ornatur, ulterius operantes continuamur, mala libenter tolerando armamur, & honesti reddimur, cum honestum aut ipsa virtus est, aut res gesta virtute. Nec mirum est: virtutis iter plenam à Theologia accipimus, ut è contrario lubricam ad vitium viam fugiamus. Hoc itinere ducti imprudentiam peccantium devita-

mus.



mus! Subaudimus eos viva voce Theologiæ instructi, sumptibus suis arcessere sibi malorum ultimum, ut celerius pereant, domos ipsosmet suas fodere, quibus obruantur velocius, rogos extruere, in quibus ardeant, laqueos necere, quibus se interimant, aucupari voluptates momentaneas, ut doloribus crucientur, & dementiam eorum satis demirari non possumus! Ruere eos infelices, nec suæ memores salutis, quam turpe est, tam honestum doceri Theologiâ in recto virtutis hominum pedem stare debere. Aperit illa oculos inani lucrô rei levissimæ, nulliusq; pretii curis vigiliisq; vitam terentibus, fluxam voluptatem multorum annorum labore mercantibus, ac circumspiciant tantisper, quam horribilia eos mala circumstent! & clarè explicat, & explicando vehementer obtestatur. Quis tandem satis prædicet, quanta hinc & quam opima spolia detrahit inferno, & quam gloriosô triumphô infert Cælo? Quis satis cogitando complectatur? quot animas tanquam hostias funestæ cædi ac rapinæ infernali per peccatum destinatas eripit? quas coronâ beatitudinis exornandas restituit. Pestilens omnis culpa ab hac exploditur, quo demum in gradu malorum hæreat, per hanc non habet. Videmus eam præceptis Theologiæ, ac scimus dolore corpus conficere, caliginem menti offundere, vim iudicii labefactare, vires ingenii frangere, aciemq; hebetare, de statu naturæ totum hominem dejicere, mortem asferre teterrimam scimus ac videmus. Impuros quò sua nefaria libido rapiat? avaros quos ad scopulos opum cupiditas allidat? heluones, quam in charybdim immergat? vanissimos quomodò lapsu fædiore ruituros in altum attollat? per sacram hanc sapientiam exploratum est. Dicamné ampliùs? dicam, taceo! ipsa Theologia omnibus lacrymis gemitibusq; deplorandam mortalium alloquitur amentiam. Imminet tibi æterna mors! cur te novis quotidie criminibus inquinat? Vides carnificem à tergo strictô ferrô manuq; elata paratum ad cervicem tibi amputandam! cur contra honesti leges gradiens infelici gladio ultro caput submittis? Ipsa tandem ego religione virtutumq; ordinibus stipata, verbis quam ornatissimis ad tribunal illud, coram quo universæ causæ bene ac malè gestorum examinantur, tantæ impudentiæ fidem faciam. Horret animus plura dicere, quemadmodum exhilaratur virtutibus omnibus Divinam Theologiam contra scelera decertare universa. His illa armis munita, in causâ fidei vindicanda, in rebus Ecclesiæ tuendis, in cultu Divino amplificando, in audacia adversariorum comprimenda, in peste proterviæ grassante propulsanda, denique in ipsa potestate tenebrarum frangenda, & bella ciet, & palmam

Capeffit.



capessit. Proterit infidelitatem fide, desperationem spe, odium  
charitate. Humilitate superbiam proculcat, liberalitate tollit avaritiam,  
continentiâ expungit luxuriam, mansuetudine condemnat iram, benevolentia  
annihilat invidiam, temperantiâ pessundat gulum, vigilantia comprimit  
acediam. Prudentia præterita in memoriam revocat, præsentia ordinat,  
futura præcavet. Beneficia, quæ accepimus, delicta, quæ commisimus,  
adversa, quæ habuimus, vilitatem, in qua nati fuimus, hac discretionem,  
morumq; regulam nostris sistit in oculis. Temperantiâ, animi imperio  
corporis potentias subjicit. Nos epulatu- & exultatu- in conspectu  
Dei erudit iustitiâ. Ad resistendum malo, & perseverandum in bono  
præmunis animos fortitudine. Quid mihi dabis in moribus rationi  
congruentibus, quod aut ab illa non accipias, aut si velis, hac ductrice  
non sequaris? Nullum tam capitale flagitium, nulla tam vehemens  
perturbatio, nulla adeo exitialis animæ ruina, cui Sacra Theologorum  
doctrina mederi non contendat. Nulla in arduo ita posita est virtus,  
ad quam Theologia non entatur, ipsius probitatis magistra. Veræ  
istius causâ cogere copias, signa conferre, instruere acies,  
prælia committere, & contra singulas hæreses tela mittere,  
tormenta displodere acerrima, distingere gladios, fugare hostes,  
& mille plagis vulneribusq; illatis conficere usuvenit Theologiæ.  
Disputationes maximæ, coacta concilia, auctoritas Ecclesiæ,  
responsa Pontificum, rationes accuratæ, argumenta fortia,  
quibus deteguntur mendacia, aperiantur errores, patefit veritas,  
delentur & extinguuntur furia, arma hæc sibi sunt pro vindicanda  
virtute, hi umbones, hi gladii. O pulchrum sine sanguine triumphum!  
Et verò fundatur Catholicorum sanguis, ut fusus est Sanctissimorum  
Virorum, virtus tamen nitidissima nullis maculis offundetur.  
Ructentur sermonibus proscriptiones bonorum, cædes & exitium parentur,  
impetantur bona, divitiæ & vita eripiantur, acquisita de thesauro  
Theologiæ virtus neq; cedit, neq; cadet. Hac perfecte imbuti  
Catholici ad ipsam divisionem animæ pro sacra expiatione delictorum,  
pro Eucharistia, pro Sacramentis omnibus, pro placitis nostræ fidei,  
pro Sanctorum ope, Virginis Matris patrocinio, Christi JESU decretis,  
Vicarii sui Romani Pontificis auctoritate, sacrificiis rei Divinæ,  
ritibus & cerimoniis Ecclesiæ, ejusdemq; unitate sunt decertare parati.  
Illi namq; cum Christo nomen suum dederunt, Capitis sui sinceri  
imitatores effecti, quid se præstare melius, & præstituros esse  
gloriosius per omne tempus arbitrabuntur? quam ut facibus hujusce  
doctrinæ flagrantibus inflammati, bono & acerrimo mentis acumine  
præditi, pro suo Ser-  
vatore



vatore pulchram mortem oppetant. Agant Heterodoxi funera, iras acuant, enses expediant, lacerent, perurant, jugulent, mille in partes dividant, sanguine nostro se exsatiarent! non erit ad mortem minus animi, quàm est ad virtutem. Suppliciorum non terret nos acerbitas, aut tortorum furor metum incutit. Et facere & pati fortia, Catholicum est. O virtus! o sanctitas! nihil potest extra te optari. Nihil enim te est melius, ipsa pretium es tuum. Sola tu & unica æternùm æstimaberis. O virtus ipso hujus disciplinæ labore humanis instillata cordibus. Testor Gregorios, Ambrosios, Aquinates, & omnes Ecclesiæ Doctores, testor Alumnos sacrarum Familiarum præstantissimos, testor Auctores & Parentes sanctissimorum nostræ Religionis Ordinum, qui præsidii Theologiæ tantam Divini Numinis cognitionem adepti, & tuam perfectionem sunt consecuti. Atq; postremò justum Iudicem & munificentissimum bonorum retributorem Deum testor, Qui te solam in civibus supernæ coronabit patriæ, & aureolam expediri, & dari sibi imperabit, quam Theologorum capiti cum titulo Doctoratûs perenniter duraturo imponet. Quanta tunc virtutum universarû erit exultatio, & congratulatio! quàm grata totius concionis Cælestis voluntatis significatio! dum singuli accepta beneficia ipsamq; nunquam immutandam felicitatem monitis, contentionibusquæ docentis Theologiæ deberi affirmabunt. O multis & innumeris modis beata Theologia! quid ultra te cogitabo honestius? quid amabo præstantius? quid prædicabo gloriosius? Discedant ab amore inanis gloriæ cupiditates, & honorum hujusce sæculi exulet aviditas, sola Theologia mentem occupet, quæ sola beatæ consequendæ patriæ media hominibus subministrat. Nihil jam ego supra hanc ad mores componendos felicius video, nihil desidero, nihil cogito honestius, nihil deformius esse, quàm nullum habere amorem Theologiæ honestatis, voce qua possum maxima pronuntio.

### III.

Quid tandem vultis? video vos expectare, quod de utilitate in ultimam orationis partem reservavi, ut, quantum Theologia possit ad Kerumpublicarum integritatem conservandam? audire cupiatis. Huic ego utilitati cum diligenter attendo, intelligo nullum statum & fortunam esse mortalium, cui suffragari Sacra Theologia non videatur. Neq; domi, neq; foris, neq; in foro, neq; in tribunalibus, neq; in contrahendis negotiis, neq; in agendo quocunq; modo juriû & ratione, neq; in Ecclesia, neq; in curia, in vita, in discessu animi è corpore, in bello ac pace, adversa & in prospera fortuna abesse ab hominibus potest tantum



& tam inæstimabile donum. Reor enim utilitati Reipublicæ conservandæ sufficere fidelem amorem, defensionem virilem, nobilem ornatum, ordinationem debitam, sagax regimen, & inter tantas hujus vitæ varietates, amoris incitamento, defensionis præsidio, ornatui commodo, ordini fulcro, regimini auxilio Theologiam esse pleni sunt omnes libri, plenæ sapientium voces, plena exemplorum vetustas. Quis superbos & arrogantes animos mitigat? exultantem ferociam decoquit, duram et crudelem imperii necessitatem temperat, discordantium voluntates dulciter capit, gloriose illaqueat, suaviter premit, onerat delectabiliter, fortiter stringit, prudenter erudit? amor in Theologia præceptus. O felix amor! ex quo oritur strenuitas, morum puritas, affectionum subtilitas, intellectuum & desideriorum sanctitas, operum claritas, virtutum fecunditas, meritorum dignitas, & sublimitas præmiorum. Ab hoc fonte gubernandi principia trahuntur, in hac regula Rerumpublicarum forma describitur, in hoc ariete publica civium salus fortiter defenditur. Dextro Marte hosti resistere, non clam & per cuniculos pugnaturis assistere Principibus, tutè perseverare in proposito, capta perficere, nunquam enervari, semper in bono progredi, fortitudinis est ab hac rerum Divinarum scientia imperata. Hæc inquam molitur, ut non tantum habeatur in regno potestas, sed usus etiam potestatis optimus, & dum imperium vicaria Dei manu flectitur in terris, ad cælestis regiminis formam temperetur. Quemadmodum terrena omnia deciduis veluti feminibus è cælo prodierunt, ita perpetuo quodam cum Divinis commercio conservari per hanc sciuntur. Ut potestas omnis ac bonitas à suprema Potestate & Bonitate infinita dimanare intelligatur, hæc erudit, hæc terrarum Dominos præcingi virtute & fortitudine lenissime persuadet. Accedant ad eam gentes & insulæ, & mutuentur fortitudinem, ornamentò & ipsæ suarum Rerumpublicarum futuræ. Ornabunt faciem earum in verecundia & sobrietate, indutæ justitiâ ornabunt coronis aureis. Circumdabunt eas ornamentò necessitatis, pompæ, congruitatis, tanquam sponsum decoratum coronâ, & tanquam sponsam ornatam monilibus. Nam cum Artifex ille supernus cælum stellis, terram plantis, mare piscibus, ærem avibus, arbores foliis, pecudes pilis, tum Respublicas triplici hominum statu, Sacerdotum videlicet, militum, sponсорum seu conjugum ornari voluit, in ornatis iisdem, ut spiritualiter isti Sibi ministrarent, illi contra hostem animæ triumpharent, virgines seu sponsi per charitatis conjugium Sibi copularentur, Theologicis id tractatibus fore inculcandum decrevit. Parent quicunq; altissimi decreto Judicis, splendore  
discre-



diferetionis refulgent, conversationis virore nitescent, humore devotionis firmantur, impulsu contemplationis volitant, decore bonæ verborum usurpationis clarificantur, & fervore dilectionis inflammantur. Beati homines, beatæ Respublicæ, quæ hanc invenerunt sapientiâ meliorem acquisitione & negotiatione argenti & auri, cujus primi sunt & purissimi fructus. Ornat eas Theologia velut sponsa fasciæ suæ pectoralis nunquam oblita, & in bonum ordinem digerit. Hinc ordo morum & actuum, ordo rerum & statuum proficiscitur. Hinc agendorum regulam Deum esse, nihil regnis conducere ad salutem, quod cum Illo non concordet, Illi & publico bono servire oportere, sagaciter populum regi, moribus feros, agendi consuetudine barbaros, ad leges Divinas humanasq; cicurari, hinc ortum esse nemo est, qui dubitet. Quantus ordo, scire, quod bellum licitè suscipiendum, quod ineundum fœdus, quæ pax tractanda, quæ rumpenda societas, quæ condendæ leges, quæ vectigalia indicenda, quæ prohibenda, quæ imperanda, quæ urgenda, ut sive blandientem suaviter, votisq; adspirantē omnibus sortē experiare, sive sævientē immiseri-corditer & resstantē perpetuò fortunā feras, in utraq; vitæ conditione tam dispari, studiō tamen pari, quod tuū est consequaris, quantus ordo! quàm sagax regimen! Majestas horum utroq; continetur Regia, sed ut sit fulgida, inflammatur pietate. Nam ut majestas quædam est Divinitatis participatæ dignitas, ita pietas est ejusdem quoddam cum Divinitate conjugium. Stabilitur thronus potentiâ, sed leges moderante Theologia. Coactis floret consiliis, sed ut hæc ad primæ Mentis regulam confirmentur, procurat Theologia. Regna perennant judiciis, sed balancem ratione librat Theologia. Bellis susceptis pacem quærit Respublica, sed ne irrepat vel nocendi cupiditas, vel ulciscendi crudelitas, vel implacabilis animi feritas, prohibet Theologia. Prohibet verò doctrinâ sacrarum literarum à IESU Christo petitâ, traditâ ab Apostolis, Patrum gravitate, clarissimorum Virorum testimoniis, summorum Pontificum responsis perfectâ stabilitâque. Hæc in Academicis resonat, in cætibus Sacrarum Familiarum viget, in templis dominatur, in suggestis ad populum congregatum non silet. Hæc non exulat à curia, à Pontificum sedibus non discedit, ab ipsius visibilis Fidei nostræ Capitis aula nunquam abesse potest. Hæc in sapientissimis Doctoribus, laboriosis Professoribus, Evangelicis Præconibus ardore & pugnandi contentione inflammata, nunquam deficit, somnō aut curis nunquam elabitur, quæ cum sanctis animalibus requiem non habet, oculis antè & retro plenissima. Loricam Religionis Catholicæ induta, perstat in acie

D

ad



ad lucernam ardentem bonorum operum viam mandatorum.  
Dei currentibus perpetuò invigilat. Non levis est illius labor in effingendis hominum moribus & affectibus excitandis, quibûs hostium tantæ multitudini possint obistere, & illorum incitatos ac furentes impetus comprimere. Obstant audacter, comprimunt gloriose, & quæcunq; ex hæresum colluvie reportant trophæa, ea Cælesti Theologiæ deferenda esse satis intelligunt. Sit sanè, quod sinè dolore nefas dicere, ab Heterodoxis Fidem Religionemq; nostram despectam esse: nos eam colimus, & æternum colere parati sumus. Confixerunt illi errores libidine ducti, & falsa dogmata amplexantur, nos veritatem & sacra Dei præcepta mente in obsequium fidei captivata profitemur. Pudeat eos à Matris Ecclesiæ gremio disjunctos, in sexcentas divisos sectas, in turpes abivisse factiones: nobis in uno Ecclesiæ sinu complexuq; acquiescentibus Catholicam Romanam Sedem tueri ac defendere gloriosum summèq; decorum. Illos mortuos esse ob defectum necessariæ ad animorum incolumitatem medicinæ, quam Sacramenta ingerunt; quis non videt? nos ea debito honore frequentes prosequimur, ad immortalis Regni gloriam iis utimur, & restituti ad gratiam sani semper vivimus. Illis cum sacramenta non sint, sacrificia non sunt, aut cum hæc pauciora Christi institutò videantur? nulla sunt: nos Victimam hanc cælestem supplici adoratione, corporibûs pronis, pectorum percussione signò humiliationis debitæ; testamur, veròq; Corpore Domini ac Servatoris, non fictitio, non figurâ, non ad tempus transubstantiato, ad satietatem animæ vescimur. Illi oves errabundas se nominari sinant! cum Sanctis nos communionem habemus. Horum suffragiis nitimur, horum precibûs meritîsq; inutilia terræ pondera à malo in bonum inducimur. Verum Dei cultum in Ecclesia Catholica intemeratè retentum sacrosanctè servamus, & beatas eo reddi Respublicas indubitanter asserimus. Nec aliunde tantum boni in Regna, cuncta rectè pensando; evenire dicitemus oportet, nisi è Theologiæ Sacræ disciplina omnium utilitatum dūce ac principe maxima. Illâ reapse disciplinâ, sinè qua nihil suis numeris absolutum esse dignoscitur. Illâ rerum immutabilium notitiâ, verè Dei immortalis donò & inventò, quo fidem florentem, incolumem Religionem, tantam Sacramentorum frequentiam incrementum ardoris & amplificationem maximam, tantâ assiduitatē pietatis, tam inflammatum in Sanctos omnes studium, obedientiam & devotionem singularem aspicimus. Sectantes istam sapientiam evoluti corpore, imò etiam in carne hac, in pelle hac, in ossibus, in nervis istis & arteriis ad sedes cælorum recepti, reli-

qui



quibus contentibûs artibus atq; scientiis, silentibûs disciplinis, quibus opus non esse taciti etiam dicitis; dogmata isthæc in Beatorum agminibus, in Divinis mentibus, in Christo JESU, in Sanctissima TRIADE perspicuè clarèq; ostensa nunquam videre desinemus. Quid hoc est optabilius? quid utilius? quid ad conciliandos animos mortalium potentius? & quid ad pertrahendum suaviter eum, quo se quisq; prosequitur amorem, plus posse videtur? Parùm ista sufficere ad utilitatem ex Theologia capiendam effrontibus ultroq; veritati terga opponentibus quametfi permiserimus, quid erit Theologiam ad leges Evangelii & Christi effata compositam, non de illis solùm, quos amicitia aut communione conjunctos habet, verùm etiam de inimicis, de ignotis & alienis bene mereri studere? meâ sententiâ summa est utilitas. O Theologiæ utilitas! quæ etiam ad perniciem nostram attentos, sanctissimis quibusq; viris metum perpetuum incutere conantes revocas à consiliis, & plerumq; nobis augeri in societatem inducis. O Theologia quàm percommode & magnò nostrum omnium sit solatiò, quod infinita hostium invidia cum incredibili imbecillitate sit per te conjuncta! O Theologia ad quantas vigilias, ad quàm arduum laborem cùm in Religionis Divinæ integritate retinenda, tum in sentibus vitiorum extirpandis hos vocas, qui candidati veræ tuæ dignitatis nominari expetunt, & in aula æternitatis ambiunt renuntiari tui sinceri amatores.

Jure tibi gratuleris tuos officiò, tuis certatim deditos laboribus, innutritos vigiliis, annos & impensas non ludicris rebus, aut oblectationi, sed uberrimè à te proficiscenti virtuti insumentes, probos, modestos, sinceros, à luxu & superbia remotos, ambitionis immunes, excultos ingeniò, remissos affectibus, benignos affatu, consuetudine probatos, verbò Theologos bonos, Professores sedulos ad supremam tuam Doctoratûs lauream invitari. Tales nancisceris PERILLUSTRES VIROS, qui virtutibus tuis in se theatrum delegerant, unde lumen laudabilium operum, & emicans non solùm domi, sed peregre etiam magnæ eruditionis splendor faciliùs in omnes Academiæ partes funderetur & coruscaret. His à prima Academica vita in naturam transiverat, bonas literas ab egregiis adolescentibus percipi curasse, studia coluisse, acuisse ingenia, limasse doctrinas, perfecisse omnes disciplinas, & consummasse. Nacti quos fuerant per id tempus instituendos patriæ surculos, non fucata & e mentita specie, sed vera ac solida virtuti junctæ sapientiæ ratione, ita eos imbui fecerunt, ut scirent sua indole ad omnia officia rite obeunda primùm rectè uti, deinde Eorum promerita atq; dexteritatem in agendo, apud Prin-



eipes primosq; Regni Cives laudatissimè extollere. Quid suos memorem singulos Discipulos, quos & in hoc scientiarum fonte, in suis Majoris Minorisq; Poloniæ Coloniarū rivulis, cum ad ovile Domini ritè rectèq; custodiendum formando Pastores, tum ad Regni negotia fortibūs suscipienda brachiis instituendo cives excoluerunt? Loquuntur illi operam suam non perditam esse in Magistris, atq; vitam inculpatam & mores omni homine dignos prædicant quaquaversum, æternūq; non silebunt. Nam quis est proborū liberaliter educatus, cui non educatores, cui non Magistri sui atq; Doctores, cui non locus ille mutus, ubi ipse altus, aut doctus est, cum grata recordatione in mente versetur? Resonant Contubernia studiū disciplinarū, progressiones mirabiles virtutū, in mentibus alumnorum vigili suo labore, cum incredibili celeritate factas, illudq; beneficii genus usurpant frequenter, crebrius prædicabunt. Ut enim medico, ita præcipienti recta honestaq; superiori operæ pretium solvitur, animi debetur. Quid eorum incredibili atq; toties commendatā eloquentiā, qua audientium animi ad gloriæ cupiditatem alerentur? magis expetendum videbatur? DEUS bone! in quantos se usus dives Illorum lingua dispersit? Sævit non millies ex pulpitis Ecclesiasticis in monstra criminū, cucurrit ut fluvius leni susurrō in elogia Sanctorum, fluctuavit ut profundum; quoties aut honor Procerum Regni suos Oratores, aut lacrymæ morte elicitæ consolatores suos haberi voluerunt, & quamcunq; vivis verborum coloribūs pinxit speciem, altorum adstipulatione sensuum veri repræsentavit imaginem. Magna & varia res est eloquentia, nec adhuc ulli sic indulgit, ut tota contingeret. Satis felix est, qui in aliquam ejus partem est receptus. At PATRES nostri PERILLUSTRES cum scirent parva submissè, media temperatè, magna granditer dicere, cum invenirent præclarè, disponderent apertè, figurarent variè, enuntiarent magnificè, quis satis demiretur vim integram fluidè dicendi facultatis eos complexos esse! Testatur id multitudo in concionibus docta, referunt mentes hominum, pro re modò huc, modò illuc impulsæ, prædicat salus populorum, & publica privataq; Religionis utilitas maxima ex parte contenta, fatentur politicæ, sacræ, scholasticæq; Cathedræ, divinarum & humanarum rerum exquisitissimā doctrinā dominari Eos & regnare expertæ, promulgant legationes cum dispendio vitæ, pro incremento honoris & commodi rebusq; tegendis & sarcendis Gentis literatæ gloriosè perfectæ & absolutæ, ipsa demum publici juris facta volumina suavi eruditione respersa, non solum hīs, quæ ad temporanea essent, sed etiam illis, quæ ad Deum pertinerent referta,

non



non magis sapientes hos PROFESSORES vivere ab animo, quàm à calamo testantur. Meritò illos beatos dixerim, quibus Deorum munere datum est, & scribenda facere, & legenda scribere, ea verò scribere, in quibus accuratissimè Principum virorum celebratæ virtutes, disceptationes de Religione solidæ, sententiæ de maximis gravissimisque rebus explicatæ, quantum possit Horum erudita vox, oratio, sensus, satis declarant. Magna hæc, magna sunt prorsus, quamet si à me nec à limine, ut ajunt, salutata. Quis enim illorum satis numerabit promerita, quorum nullum temporis momentum sine novo effluxit labore. Philosophia dux vitæ, virtutis indagatrix, vitiorum expultrix, inventrix legum, morum magistra & disciplinæ id acerrimò Eorum ingenio consecuta est, ut non solum studentes, sed etiam conversantes juvaret. Quid enim huic contra morbos subsidio, ingenii remedio, & præsidio amicorum, quid inquam perdifficili scientiæ, laborum, operæ, curæ, virium & vitæ in extraditis summa cum diligentia suis Cursibus non impenderunt? Probârunt, quod verius esset inquirendo, nunquam destiterunt à concertationibus publicis aut privatis exercere suos, quæstionem, quæ in contentionem venerat, discutere, vel oppugnantis vel refellentis sustinere personam. Eos Discipuli, Eos Philosophi, cuncti Academicæ alumni, omnes singulorum ordinum & classium commilitones gavisi sunt sibi solertes & patientes vigiliarum præfuisse Decanos. Reliquerunt enim torporem ignavis, luxum perditis, desperatis insolentiam, & in omnibus studiis & actionibus suis quid deceret, indagârunt, & discendum instillârunt animis. Magnitudo ingenii, singularis admirandaque reconditorum evolutio, præstantia, qua inter Philosophos Principatum & dominationem, nacti sunt amplissimam; absorbet dicentis copiam. Ipsa Philosophia domi forisque fortiter defensa, ipsa Facultas Artistica tantò Subjectorum adaucta numero gratias sibi, quas potest maximas agere videtur. Formârunt eorum animos, quos laureis exornaverunt Philosophicis, spiritum ad gravamina Academica, promptè suscipienda indiderunt, vitam disposuerunt, actiones rexerunt, agenda & omittenda demonstrârunt, & Almam suam Matrem Universitatem prole eruditione fecunda cumulârunt. Utinam! utinam tantum esset flumen ingenii, tanta vis roborque orationis, quantum PERILLUSTRES VIRI nullis se subtrahendo negotiis, sudârunt, & asserunt, videremus profectò Eos nunquam erectiores animò, & sublimiores mente, quàm cum opus Dei molirentur, nihilò magis exulceratos, quàm Religionis detrimentò, bene semper omnia & ad amissim operatos, eò ascen-



gentes, quò invidia nec sequi audet, nec potest. Nihil in se  
admiserunt laxum, præter morum animi liberum. Hòc Mora-  
lis, hòc Sacramentalis, hòc Speculativæ, Controversæ Theolo-  
giæ arcana investigare, clarè & ad captum faciliter perquam  
frequenti audientium turbæ instillare, adnixa sunt. Quoties  
descenderunt in aciem, toties de rebus Divinis gravissimisque  
Theologiæ sententiis strenuè disputantes palmam retulerunt. Ni-  
hil Eorum mentem præterit, quorsum res tenderet, attento in-  
tellectu considerârunt, & cauti in cautes non inciderunt.  
Specimen antiquæ Eorum virtutis & fidei nôrunt illi omnes, qui  
suos sudores lautiùs biberunt, collegerunt in chartas, & hæc-  
enus colligunt. Exclamant ii, gestiunt, exultant, sub vigilibus  
Magistris se plurimum profecisse, & suam magnitudinem quoad  
possunt, voce calamisque declarare conantur. Quidni verò in  
sua causa triumphare videantur? cùm bonorum operum consul-  
tore spiritu animatos Professores, nihil sibi edictasse, quod rati-  
oni non consonaret, experiantur. O quàm dulce est sub tantis  
Ducibus sacræ militare Theologiæ, qui integritati suæ nunquam  
injurii nullam planè nomini suo notam inurunt, qui ab inhone-  
sto abhorrent animis & refugiunt, gliscunt in utilitate virtu-  
tum, ad indecora non deflectunt, cuilibet turpitudini se oppo-  
nunt, toti bonis operibus diffluunt, quæ perniciosa sunt, penitus  
averruncant. Sive de DEO loquantur, sive de Sacrosancto In-  
carnationis mysterio, de notis Ecclesiæ, de Summo Pontifice  
Romano, de Sacramentis, de virtutibus, de abditissimis sacræ  
Doctrinæ difficultatibus eruditas concertationes instituunt, forti-  
bùs argumentis publicas lucubrationes, noctium dierumque par-  
tus præmuniant & exornant? veraces esse, & viam DEI in ve-  
ritate docere intimo Sapientùm virorum applausu audiunt.  
Ob tot egregias dotes, cuncta laudum ornamenta sibi vendi-  
cant. Præstantissimè omnia pro bono Regni istius Scholæ etiam  
gravissimis temporibus agendo, nomen suum commendant im-  
mortalitati. Decorem Domûs DEI ab Illis dilectum esse,  
ipsi muti Templorum parietes & sacris Victimis devota altaria  
clamitant. Primum quidem Nasiechovicensis Mecænatem, Al-  
terum Veterocorcinensis Restauratorem sponsæ suæ Ecclesiæ ni-  
hil tentare absque exitu, nihil agere absque gloria, nihil ag-  
gredi absque effectu, nihil assumere, quod utrique ad hono-  
rem non cedat, palam testificari gestiunt. Gestientes ego non  
impedio, at Vos PATRES Optimi operâ, consiliò, studiis, ad  
omnes exigentias accommodari, pressos incommodorum acerbis-  
simis nunquam tamen effatos versari, nullum diem neglige-  
re,



re, nullis voluptatum blanditiis deliniri, assidua & non intermissa contentione, seria, gravia, & Academiae utilia meditari, ad vindicandam saeculi gloriam, ad demerendam posteritatem animo vegetos & erectos, non tam oris facultate, quam studio officioque meo libens reverensque non fateri nec debeo, nec possum. In culmine literarii honoris consistitis, quia per declivia virtutis non ferebamini. Solerter negotiis applicati, partes omnes explevistis praestantissimae indolis. Virtus vestra emerita, ita se omnibus exeruit spectanda, ut cum ditesceret verbis, nunquam egeret ingenio. Junxit nimirum inter negotiorum molimina cum florida elocutione sapientiam divitem. Hac vitae Academicæ norma anteverit rerum eventus, curas praecipuavit agendas, malis occurrit venturis, pugnavit ante pugnam, antequam vinceret, reportavit victoriam, egit antequam ageret, absolvit, antequam inciperet. Magnitudo sua illa est, qua animus vester inter difficilia infractus, captus amore sapientiae, omnibus vel commoditatibus, vel jucunditati universae honestatem & laborem anteposuit. Constantia, quae sola coronatur, cum aliae virtutes mereantur coronam, haec inquam vestra constantia, nescio an potius patientia? qua vos armatos neque laboris Academici perplexitates à suscepto consilio deterruerunt, neque vitae suavitates à natura unicuique praescriptae ab instituto cursu avocârunt, neque aliquod otii desiderium ab incredibili celeritate retardavit. Miror Vestram industriam, qua ita in hoc doctrinae curriculo usi estis, ut ne minimum quidem à summa laude abesse videremini. Nulla enim res dignitatem & veram utilitatem afferens tantum difficultatis habuit, ut non posset vestro ingenio diligentiaque superari. Superastis vigiliarum adversa rebus omnibus cognoscendis & agendis intenti. Nulli à laboribus petiistis vacare. Una Vobis cura fuerat, ut quovis officiorum genere conscientiae satisfaceretis. Devoti, vigilantes, nusquam malis conniventes ostendimini. Navi, industrii ac solertes auditis. Consilio & acri mente feliciter imbuti unâ cum annis fecistis mores senescere. Honestissimi illi praeclaris gestis & omni sapientiae claritate ornatissimi ad imos vestros permeârunt sensus & in succum ac sanguinem conversi sunt. Quoniam verò angustiis temporis ita coarctor, ut ne in re quidem perfacili me satis unquam expediam, vestraque promerita sunt ejusmodi, ut in illis pro dignitate explicandis, tota utendum sit aeternitate, pace vestra jam littus orationis appello. Vestrae virtuti copia dicendi instructissimis ad praedi-



candum relictæ; vivere Vos, & in hoc commorandi diverso-  
rio à natura concesso Dii boni hucusque versari permittant, do-  
nec ipsi non parcentes labori, cum hostibus Ecclesiæ omni rati-  
one dimicantes, adeuntes pericula, vitam ipsam in hoc præ-  
stantissimo Doctoris Theologi complendo munere, cum gau-  
dio profundentes, ultro hinc evolare non cupiveritis. Atque  
ego dignitati, honestati & utilitati Theologicæ hæcenus pro vir-  
ili immoratus, sacris usus sum, modicè quidem, quia Philo-  
sophus. Crescent in animo vires, si vita non decreverit. Vos  
qui causâ laudum Theologiæ huc frequentes convenistis, ino-  
piam, parcitatemque verborum non cælesti huic disciplinæ, sed  
exili jejunæque orationi & imbecillitati dicentis tribuendum  
putetis.



BIBLIOTHECA  
VNI. IACELL.  
CRACOVENSIS



